

每週經課朗誦經文(巴克禮漢羅/教羅)2012/12/16

共同經課 - 1 西番雅書三章十四節~二十節

14 錫安 ê 百姓 ah, 應該 tiòh 唱歌; 以色列 ah, tiòh 歡喜來叫; 耶路撒冷 ê 百姓 ah, tiòh 滿心歡喜快樂。15 耶和華已經除去你 ê 罪案, 趕出你 ê 對敵; 以色列 ê 王耶和華 tī 你中間; 你免 koh 驚災厄。16 當 hit 日, beh kā 耶路撒冷講, 莫得驚; 錫安 ah, 你 ê 手 m̄-thang 垂落去。17 你 ê 上帝耶和華 tī 你 ê 中間, 就是全能 ê, 拯救 ê; 祂 beh 爲 tiòh 歡喜你來快樂, 祂 beh 因爲疼你來靜靜, koh 爲 tiòh 歡喜你來唱歌。18 因爲欣慕節期來憂悶 ê, 我 beh 聚集 in, in 是屬你 ê, in 擔當凌辱親像擔重擔。19 看 ah, 當 hit 時, 我 beh 辦 hiah-ê 苦楚你 ê, beh 拯救跛腳 ê, beh 聚集受趕逐 ê, hiah-ê tī 全地受凌辱 ê, 我 beh hō in 得 tiòh o-ló 名聲。20 Hit 時我 beh hō lín 來, hit 時我 beh 聚集 lín; 因爲我 hō lín 受掠 ê 人 tī lín ê 目前倒 tng 來 ê 時, 就 beh hō lín tī 地上萬百姓 ê 中間, 得 tiòh 名聲 o-ló; 這是耶和華講 ê。

共同經課 - 2 以賽亞書十二章二節~六節

2 看 ah, 上帝是拯救我 ê; 我 beh oá 靠伊, 亦無驚; 因爲主耶和華是我 ê 氣力, 是我 ê 詩歌; 伊亦成做救我 ê。3 Lín beh tùi 救恩 ê 水泉歡喜來 chhiūⁿ 水。4 Tī hit 日 lín beh 講, Tiòh 感謝耶和華, 求叫祂 ê 名, 將祂所行 ê 報揚 tī 列邦中, 講起祂 ê 名已經受尊做高。5 Lín tiòh 唱歌 o-ló 耶和華; 因爲伊所行 ê 真顯赫; 願 chit-ê tai-chì 遍傳 tī 天下。6 錫安 khiā 起 ê 百姓 ah, lín tiòh 出大歡喜 ê 聲, 因爲以色列 ê 聖 ê tī lín ê 中間做大。

共同經課 - 3 腓立比書四章四節~七節

4 Tiòh 常常 tiàm-tī 主來歡喜; 我 beh koh 講伊, tiòh 歡喜。5 Lín ê 純良 tiòh 對眾人顯明。主近 lah。6 一概莫得掛慮; 獨獨萬事 tiòh 用祈禱懇求 kap 感謝, 將 lín 所求 ê 排列 tī 上帝; 7 就上帝 ê 平安, poáⁿ 過一切人所想會到 ê, beh tī 基督耶穌保守 lín ê 心, lín ê 念頭。

共同經課 - 4 路加福音三章七節~十八節

7 Choē-choē 人出來 beh 受約翰 ê 洗禮, 伊就對 in 講, 毒蛇 ê 類 ah, chī-chūi-á 指示 lín 閃避將來 ê 受氣 ah? 8 所以 lín tiòh 結 hit 號合 tī 反悔 ê 果子。莫得家已 phah 算, 有亞伯拉罕做阮 ê 父; 因爲我 kā lín 講, 上帝會 tùi chiah-ê 石頭出 kiaⁿ 孫 hō 亞伯拉罕。9 Taⁿ 斧頭已經 hē tī 樹頭; 見若樹無結好果子 ê, 就 chhò 伊, hiat 落火。10 眾人問伊講, Án-ni, 阮 tiòh 怎樣做? 11 伊應講, 有兩領衫 ê tiòh 分 hō 無 ê; 有物 thang 食 ê, 也 tiòh án-ni。12 抽餉 ê 也來 beh 受洗禮, 對伊講, 先生 ah, 阮 tiòh 怎樣做? 13 伊對 in 講, 定 tiòh ê 餉以外, 莫得加 thèh。14 兵丁也問伊講, 也阮 tiòh 怎樣做? 伊對 in 講, 莫得勒索人, 莫得歪人; tiòh 掠 lín 所得 tiòh ê 糧做夠額。15 百姓 teh ng 望 ê 時, 眾人心內 teh 議論約翰 kiám-chhái 是基督, 16 約翰應眾人講, 我用水 kā lín 行洗禮; 獨獨有一個比我 khah 有權能 ê beh 來, 就若 tháu 伊 ê 鞋帶我也 boē 堪得; 伊 beh 用聖神 kap 火 kā lín 洗。17 伊 ê 手 thèh 簸箕, beh 將伊 hit 場一盡簸, 收麥入伊 ê 倉; 但是麥 hiūⁿ 就用 boē hoa ê 火燒伊。18 約翰另外用 choē-choē 項苦勸來傳福音 hō 百姓。